



OPĆINA OLOVO



BUDŽET ZA GRAĐANE

februar 2024. godina



Dragi građani i građanke,

Predstavljam Vam vodič za građane „Budžet za građane“ Općine Olovo koji na jednostavan način prikazuje kako se planira, prikuplja i troši novac iz budžeta Općine Olovo tokom budžetske godine.

„Budžet za građane“ ima za cilj da javnosti omogući bolji uvid u planiranje i prikupljanje budžetskih sredstava, te razumijevanje načina na koji se vrši raspodjela sredstava budžetskim korisnicima i ostalim korisnicima sredstava iz budžeta Općine Olovo.

Ovaj vodič kroz budžet namijenjen je svim građanima koji žele da budu obaviješteni o planovima Općine Olovo za prikupljanje prihoda i primitaka i utrošak rashoda i izdataka, odnosno da prate realizaciju postavljenih ciljeva Općine Olovo. Kroz „Budžet za građane“ želimo Vam omogućiti ne samo bolje razumijete nadležnosti Općine Olovo kao lokalne samouprave, već i pokazati područja na koja usmjeravamo budžetska sredstva.

U cilju povećanja stepena uključenosti zajednice u proces planiranja i odlučivanja, bolje transparentnosti u upravi i podrške većem učešću javnosti u procesu planiranja i razvoja zajednice, Općina Olovo je uspostavila mehanizam za izradu budžeta i plana kapitalnih investicija za ostvarivanje kontinuiranog i šireg dijaloga između civilnog društva, mjesnih zajednica i lokalnih organa vlasti. Na ovaj način nastavljamo unapređivanje otvorenog i odgovornog odnosa sa građanima u procesima donošenja važnih odluka na lokalnom nivou.

Novac kojim raspolaže lokalna vlast je novac građana. Prihodi se prikupljaju od pravnih i fizičkih lica kroz poreze (na plaće i radnu snagu, na imovinu, na promet nepokretnosti, na dohodak, kroz indirektno poreze ...), te kroz plaćanje raznih такси i naknada. Pored toga, prihodi se prikupljaju od koncesija za iskorištavanje prirodnih resursa, naknada za korištenje državnih šuma, naknada koje uplaćuju zagađivači u svrhu zaštite okoliša i dr.

Jedan od važnih mehanizama za obezbjeđivanje transparentnosti rada organa lokalne samouprave jeste javna rasprava. Javna rasprava pruža Vam priliku da u pisanoj formi iznesete svoje prijedloge, primjedbe i sugestije. Svi dostavljeni prijedlozi pažljivo se razmotre i, unutar razumnih granica, uvrste u budžet.

Također, na raspolaganju su Vam i naše mjesne zajednice kao direktna veza između Vas i Općine Olovo. One su tu da nam „prenesu“ Vaše zahtjeve i želje.

Vaš doprinos u kreiranju budžeta na ovakav način pomoći će nam da identifikujemo prioritete i stvarne potrebe građana. Vaše aktivno učestvovanje u budžetskom procesu rezultirat će kvalitetnijim upravljanjem lokalnom zajednicom.

Hvala Vam na podršci i učestvovanju u oblikovanju budućnosti naše lokalne zajednice!

Vaš Općinski načelnik
Đemal Memagić s.r.

ZAŠTO je budžet toliko značajan?

Tradicionalno gledište je da je budžet jednostavan iskaz prihoda i rashoda, prikaz računovodstvenih kategorija kojima se bave računovođe, bez potrebe da se u njegovu pripremu uključe i službenici koji rade na planiranju politika.

U modernim ekonomijama, budžet se više ne posmatra na takav način. Naime, za gotovo svaku odluku o politikama potrebno je finansiranje. Budžet je sredstvo koje pretvara vladine politike u programe i usluge za građane. Međutim, budući da su vladina sredstva uvijek ograničena, odnosno zahtjevi građana za uslugama prevazilaze raspoložive resurse, vlade moraju donositi odluke o prioritetima potrošnje. U idealnim uslovima, ove odluke trebaju biti usklađene sa najznačajnijim socijalnim i ekonomskim prioritetima.

Budžet objašnjava i način na koji se troši novac poreznih obveznika, te treba predstavljati i rezultate ove potrošnje. Predstavljeni rezultati omogućavaju poreznim obveznicima da zakluče da li se njihova sredstva „pametno troše“ i da li vladine odluke donose “vrijednost za uloženi novac”.

Budžet je i sredstvo ekonomskog upravljanja. Prevelika potrošnja uz ograničene resurse vodi budžet u deficit i može imati negativne posljedice na ekonomski menadžment. Problem izrade budžeta je problem sa kojim se suočavaju sve lokalne zajednice. Budžet se priprema i usvaja prema budžetskom kalendaru.

Sredstva budžeta koriste se za finansiranje poslova, funkcija i programa organa općine, kao i drugih korisnika budžeta, te prava primalaca sredstava budžeta utvrđenih zakonima i drugim propisima donesenim na osnovu zakona.

Budžet mora biti uravnotežen tako da ukupni prihodi i primici pokrivaju ukupne rashode i izdatke.

Prihodi i primici služe za podmirivanje rashoda i izdataka. Budžetski korisnici mogu preuzeti obaveze na teret budžeta tekuće godine samo za namjene i do visine utvrđene u posebnom dijelu budžeta, ako su za to ispunjeni svi zakonom i drugim propisima utvrđeni uslovi.

Ukupno planirani prihodi i primici Budžeta Općine Olovo za 2024. godinu iznose 6.310.000 KM.

Nadležnost Općine Olovo

Općina Olovo kao jedinica lokalne samouprave, kako je to utvrđeno Zakonom o principima lokalne samouprave u Federaciji BiH, ima vlastite nadležnosti ustanovljene ustavom i zakonom i ima pravo baviti se svim pitanjima od lokalnog značaja koja nisu isključena iz njene nadležnosti, niti dodijeljena u nadležnost neke druge vlasti na osnovu ustava i zakona.

Općina je samostalna u odlučivanju o pitanjima iz vlastitih nadležnosti, koje ne mogu biti ograničene ili uskraćene od federalnih ili kantonalnih vlasti, osim u slučajevima i u okvirima utvrđenim ustavom i zakonom. Nadležnost Općine Olovo utvrđena je Statutom Općine Olovo („Službeni glasnik Općine Olovo“, broj: 2/07, 4/08, 7/18 i 8/19)

Organi jedinice lokalne samouprave su vijeće i načelnik/ca.

Jedinice lokalne samouprave imaju pravo na pokretnu i nepokretnu imovinu i na odgovarajuće izvore finansiranja kojima slobodno raspolažu u okviru svojih nadležnosti, kao i na sredstva za obavljanje delegiranih ili prenesenih poslova iz okvira prava i dužnosti viših tijela vlasti. Učešće Općine Olovo u finansiranju određenih nadležnosti i poslova na lokalnom nivou prikazano u tabeli koja slijedi:

BUDŽET
je akt kojim se planiraju prihodi i primici, te rashodi i izdaci općine za razdoblje od jedne fiskalne godine

UČEŠĆE OPĆINE	Potpuno finansira Općina	Uglavnom finansira Općina	U manjoj mjeri finansira Općina
Obrazovanje			X
Opća uprava (matični ured, javna uprava, civilna zaštita...)	X		
Zdravstvena zaštita			X
Socijalna zaštita		X	X
Kultura	X	X	
Urbanizam, prostorno uređenje, stambena politika	X		
Komunalne i druge javne uslužne djelatnosti	X	X	
Zaštita okoliša		X	X
Saobraćaj-transport	X	X	
Privreda i poljoprivreda			X

Operativni budžetski kalendar

Operativni budžetski kalendar za izradu i donošenje budžeta i dokumenta okvirnog budžeta je raspored različitih faza i procedura/aktivnosti u okviru svake faze neophodnih za pripremanje, planiranje i usvajanje budžeta za narednu fiskalnu godinu kao i dokumenta okvirnog budžeta za period od tri godine. Budžetski kalendar propisan je članom 15. Zakona o budžetima u Federaciji Bosne i Hercegovine.

Budžetski kalendar je postupak pripreme i donošenja budžeta i finansijskih planova izvanbudžetskih fondova

Prvi korak u izradi i donošenju budžeta jeste izrada i dostavljanje „**instrukcije broj 1**“ budžetskim korisnicima. Svrha budžetske instrukcije jeste da budžetske korisnike obavijesti o rokovima, procesima i zahtjevima za dostavu podataka u procesu pripreme dokumenta okvirnog budžeta, a posebno budžeta za narednu godinu, te da se daju upute za pripremu prijedloga prioriteta budžetskih korisnika za razdoblje od tri godine. Općina je dužna dostaviti budžetsku „instrukciju broj 1“ do 15.02. tekuće godine.

Dokument okvirnog budžeta – skraćeno DOB

DOB je akt koji sadrži makroekonomske projekcije i prognoze budžetskih sredstava i izdataka za naredne tri godine i na kojem se zasniva priprema i izrada budžeta

DOB izlaže fiskalnu strategiju i budžetske planove za sljedeće tri godine i ima za cilj da razvije bolju stratešku osnovu za pripremu budžeta. DOB predstavlja preliminarni okvirni nacrt budžeta za jednu godinu, te daje okvirna predviđanja za sljedeće dvije godine. Osnova za izradu budžeta zasniva se na procjeni privrednog razvoja, razvoja socijalnog sektora, makroekonomskih pokazatelja, te prognozi prihoda i rashoda za godine koje su obuhvaćene dokumentom okvirnog budžeta.

Budžetski korisnici, na osnovu „instrukcije broj 1“, najkasnije do 15.04. dostavljaju Službi za ekonomske poslove prijedloge prioriteta za izradu DOB-a.

Služba za ekonomske poslove Općine Olovo predlaže Općinskom načelniku da razmotri i usvoji dokument okvirnog budžeta Općine Olovo do 30.06. tekuće godine kao osnovu za pripremu, planiranje i izradu budžeta i finansijskih planova u Općini Olovo. Nakon usvajanja DOB se dostavlja Općinskom vijeću kao informacija i objavljuje na web stranici Općine Olovo do 15.07. tekuće godine .



Sljedeći korak u izradi i donošenju budžeta je sačinjavanje i dostavljanje budžetske „**instrukcije broj 2**“. Svrha budžetske „instrukcije broj 2“ jeste da se daju početna budžetska ograničenja i smjernice za izradu zahtjeva budžetskih korisnika. Na osnovu „instrukcija broj 2“ za izradu nacrt budžeta, budžetski korisnici izrađuju prijedlog finansijskog plana na nivou analitičkog konta. Budžetski korisnici su dužni svoj finansijski plan dostaviti Općini do 15. augusta tekuće godine.

Do 15.08. Budžetski korisnici dostavljaju Službi za ekonomske poslove svoje budžetske zahtjeve. Po zaprimanju budžetskih zahtjeva korisnika budžeta Služba ekonomske poslove vrši obradu zahtjeva, obavlja konsultacije sa budžetskim korisnicima u vezi sa zahtjevima budžetskih korisnika i prioritetima budžetske potrošnje, nakon čega se pristupa izradi nacrt budžeta. **Nacrt budžeta** dostavlja se Općinskom načelniku do 15.10. tekuće godine.

U skladu sa članom 33. Zakona o budžetima u Federaciji Bosne i Hercegovine općinske službe za finansije, prije dostavljanja nacrt/prijedloga budžeta općinskom vijeću na razmatranje, obavezne su pribaviti **mišljenje kantonalnog ministarstva finansija** u vezi s planiranim prihodima i primicima i primjene fiskalnog pravila iz člana 43. Zakona o budžetima u Federaciji Bosne i Hercegovine.

Općinski načelnik utvrđuje nacrt budžeta i dostavlja ga, uz prateću dokumentaciju propisanu Zakonom o budžetima u Federaciji BiH, Općinskom vijeću na dalje postupanje do 15.11. tekuće godine.



Zaključkom Općinskog vijeća Olovo usvaja se nacrt budžeta i upućuje u javnu raspravu. **Javna rasprava** se provodi i o odluci o izvršenju budžeta Općine Olovo. Odlukom o izvršenju budžeta uređuje se struktura prihoda i primitaka, rashoda i izdataka budžeta, njegovo izvršavanje, prioriteta plaćanja i upravljanja dugom, prava i obaveze korisnika budžetskih sredstava, finansijsko izvještavanje, ovlaštenja Općinskog načelnika i općinskih službi, prava i obaveze korisnika budžetskih sredstava u izvršavanju budžeta, kao i druga pitanja u izvršavanju budžeta za tekuću godinu. Organ za provođenje javne rasprave je Općinski načelnik.

Poslije provedenih javnih rasprava, Općinski načelnik dostavlja Općinskom vijeću na razmatranje i usvajanje prijedlog budžeta. **Prijedlog budžeta** predstavlja projekciju očekivanih privrednih i fiskalnih kretanja u godini za koju se budžet izrađuje i utemeljen je na rezultatima izvršenja budžeta za devet mjeseci tekuće godine, te pokazateljima izvršenja budžeta ranijih godina, metodom poređenja i procjenom vrijednosti očekivanih budžetskih pozicija. Prijedlog se dostavlja Općinskom vijeću na razmatranje. **Općinsko vijeće donosi Budžet do 31.12. tekuće godine za narednu godinu.**



Na prijedlog budžeta mogu se ulagati **amandmani**. Sve izmjene i dopune koje općinsko vijeće prihvati putem amandmana na predloženi budžet ne smiju preći iznos utvrđene gornje granice rashoda i izdataka. Amandmani kojima se predlaže povećanje budžetskih rashoda i izdataka iznad iznosa utvrđenih prijedlogom budžeta, mogu se prihvatiti pod uslovom da se istovremeno predloži smanjenje drugih rashoda i izdataka u posebnom dijelu budžeta.

Ukoliko Općinsko vijeće ne donese budžet prije početka fiskalne godine privremeno se, na osnovu **odluke o privremenom finansiranju**, nastavlja finansiranje poslova, funkcija i programa korisnika budžeta. Odluku o privremenom finansiranju donosi Općinsko vijeće. Privremeno finansiranje obavlja se najduže za prva tri mjeseca fiskalne godine. Privremeno finansiranje obavlja se srazmjerno sredstvima utrošenim u istom periodu a najviše do tromjesečnog prosjeka za prethodnu fiskalnu godinu.

Ako se u toku budžetske godine zbog nastanka novih obaveza za budžet ili promjena privrednih kretanja povećaju rashodi i/ili izdaci, odnosno smanje prihodi i/ili primici budžeta Općinski načelnik može donijeti odluku o obustavljanju izvršavanja pojedinih rashoda i/ili izdataka u trajanju 45 dana. Ako se za vrijeme provođenja mjera privremene obustave izvršavanja budžeta budžet ne može uravnotežiti, vrše se **izmjene i dopune budžeta**.

Nakon donošenja budžeta, Služba za ekonomske poslove obavezna je izvjestiti budžetske korisnike o odobrenim sredstvima. **Budžet se izvršava u skladu sa prilivom sredstava na depozitni račun.** U slučaju da priliv sredstava ne prati planiranu dinamiku budžet se izvršava po prioritetima utvrđenim odlukom o izvršenju budžeta. Budžet, odluka o izvršavanju budžeta, odluka o izmjenama i dopunama budžeta, odluka o privremenom finansiranju i godišnji izvještaj o izvršenju budžeta objavit će u Službenom glasniku Općine Olovo i web stranici Općine u roku od 10 dana od njihovog donošenja.

Prihodi budžeta Općine Olovo


Javni prihodi su prihodi od poreza, taksi, naknada, doprinosa, kazni i ostalih javnih prihoda ustanovljenih zakonima i drugim propisima BiH, Federacije, kantona i općina. **Vlastiti prihodi**, u smislu Zakona o budžetima u Federaciji Bosne i Hercegovine, su prihodi koje korisnici budžeta ostvare obavljanjem osnovne djelatnosti i ostalih poslova korisnika budžeta na tržištu. **Budžetski prihodi** su javni prihodi, primljeni transferi i donacije. **Budžetski primici** su prilivi novca od finansijske i nefinansijske imovine i zaduživanja. **Budžetski rashodi** propisani su zakonom i propisima donesenim na osnovu zakona za poslove, funkcije i programe koji se planiraju u budžetu i finansijskim planovima budžetskih korisnika. Budžetski rashodi obuhvataju troškove plaća i naknada zaposlenika, doprinose poslodavaca i druge doprinose, izdatke za materijal, sitni inventar i usluge, tekuće transfere i druge tekuće rashode, kapitalne transfere, te izdatke za kamate. **Budžetski izdaci** su izdaci za finansijsku i nefinansijsku imovinu i otplatu kredita i zajmova.

Prihodi se evidentiraju i priznaju u periodu u kojem su raspoloživi i mjerljivi, a rashodi se priznaju u trenutku nastanka obaveze

PROCJENA PRIHODA I PRIMITAKA

Ukupno planirani prihodi i primici Budžeta za 2024. godinu iznose 6.310.000 KM, što u odnosu na izmijenjeni plan budžeta za 2023. godinu (7.048.700 KM) predstavlja smanjenje od 10%, odnosno za 738.700 KM.


R. br	Glavna kategorija	Naziv konta	Prijedlog 2024. godina
1	7100000	Prihodi od poreza	2.424.100
2	7200000	Neporezni prihodi	1.271.900
3	7300000	Tekući transferi	1.100.000
4	7400000	Kapitalni transferi	700.000
5	8100000	Kapitalni primici	814.000
6	5900000	Neraspoređeni višak prihoda i rashoda	0
Ukupno		PRIHODI I PRIMICI	6.310.000



71 - Prihodi od poreza

Ekonomski kod 7100000 – planirani iznos prihoda od 2.424.100 KM, što u odnosu na izmijenjeni plan Budžeta Općine Olovo za 2023. godinu (rebalans) predstavlja smanjenje u iznosu od 171.900 KM (7%). Porezni prihodi planirani su kako slijedi:

Red br	Podkategorija	Naziv konta	Prijedlog 2024. godina
1	714000	Porez na imovinu	203.000
2	716000	Porez na dohodak	577.000
3	717000	Prihodi od indirektnih poreza	1.644.100
UKUPNO			2.424.100




Zakonom o pripadnosti javnih prihoda u Federaciji BiH je detaljno regulirana raspodjela prihoda od indirektnih poreza između Federacije, kantona, jedinica lokalne samouprave i direkcija za ceste, te ugrađene mjere koje se odnose na postepeno uvođenje novog modela raspodjele prihoda po osnovu indirektnih poreza između svih nivoa vlasti u Federaciji BiH. Uputstvom o određivanju učešća kantona, jedinica lokalne samouprave i nadležnih kantonalnih organa za ceste u prihodima od indirektnih poreza i načinu raspodjele tih prihoda svake godine određuje se % učešća općina u raspodjeli. Procenat učešća Općine Olovo za 2024. godinu je 0,472%

72 – Neporezni prihodi

Ekonomski kod 7200000 – neporezni prihodi planirani su u iznosu od 1.271.900 KM i manji su u odnosu na rebalans Budžeta za tekuću godinu za 11.600 KM ili 1%. Neporezni prihodi planirani su kako slijedi:

Red br	Podkategorija	Naziv konta	Prijedlog 2024. godina
1	721000	Prihodi od poduzetničkih aktivnosti i imovine i prihodi od pozitivnih kursnih razlika	212.200
2	722000	Naknade, takse i prihodi od javnih usluga	1.059.700
3	723000	Novčane kazne (neporeske prirode)	0
UKUPNO			1.271.900



73 –Tekući transferi i donacije

Ekonomski kod 7300000 - tekući transferi (transferi i donacije) planirani su u iznosu od 1.100.000 KM i veći su za 227.500 KM (26%) u odnosu na rebalans Budžeta tekuće godine. Sredstva su planirana na osnovu izvršenja ranijih godina te činjenice da je 2024. godina izborna godina.

74 – Kapitalni transferi

Ekonomski kod 7400000 - kapitalni transferi u budžetu za 2023. godinu izmijenjeni su (rebalansirani) na iznosu od 295.000 KM. Za 2024. godinu planirani su u iznosu od 700.000 KM što je za 405.000 KM (137%) više u odnosu na rebalans. Razlog za povećanja su očekivani kapitalni transferi od viših nivoa vlasti (izborna godina).


81 – Kapitalni primici

Ekonomski kod 8100000 - kapitalni primici u budžetu za 2024. godinu su planirani u iznosu od 814.000 KM i manji su u odnosu na rebalans plana Budžeta za tekuću godinu za 1.187.700 KM (59%).

PROCJENA RASHODA I IZDATAKA

Ukupno planirani rashodi i izdaci Budžeta za 2024. godinu iznose 6.310.000 KM. Od ukupnog iznosa planiranih rashoda i izdataka budžetska rezerva je planirana u iznosu od 12.000 KM, dok je za pokriće ostvarenog deficita planiran iznos od 100.000 KM.

Glavna grupa	Naziv konta	Prijedlog 2024. godina
611000	Plaće i naknade troškova zaposlenih	1.468.500
612000	Doprinosi poslodavca i ostali doprinosi	132.150
613000	Izdaci za materijal, sitan inventar i usluge	742.750
614000	Tekući transferi i drugi tekući rashodi	1.026.600
615000	Kapitani transferi	30.000
616000	Izdaci za kamate	44.000
821000	Izdaci za nabavku stalnih sredstava	2.443.000
823000	Izdaci za otplate dugova	311.000
590000	Pokriće ostvarenog deficita	100.000
530000	Tekuća rezerva	12.000
UKUPNO		6.310.000




Plaće i naknade troškova zaposlenih (611000) planirane su u iznosu od 1.468.500 KM što je u odnosu na rebalans plana tekuće godine više za 22.800 KM. U 2024. godini planirano je usklađivanje osnovice i boda za obračun plaća uposlenika Općine Olovo sa visinom utvrđenom za organe vlasti FBiH i potpisivanje Sporazuma između Općinskog načelnika i Samostalnog sindikata Općine Olovo. Plaće i naknade troškova zaposlenih u ukupnom budžetu Općine Olovo učestvuju sa 23%.

Izdaci za materijal, sitan inventar i usluge (613000) manji su za 152.250 KM u odnosu na rebalans plana tekuće godine i planirani su u iznosu od 742.750 KM. Struktura izdataka za materijal, sitan inventar i usluge: izdaci za električnu energiju, izdaci za centralno grijanje, izdaci za usluge održavanje čistoće, materijal za opravku i održavanje cesta, usluge opravki i održavanja cesta, usluge održavanja ulične rasvjete, izdaci za naknade skupštinskim zastupnicima i dr. izdaci.

Tekući transferi i drugi tekući rashodi (614000) planirani su u iznosu od 1.026.600 KM i manji su za 261.900 KM u odnosu na rebalans plana tekuće godine. Tekući transferi planirani su kako slijedi:

Konto	Naziv konta	Prijedlog 2024. godina
614100	Tekući transferi drugim nivoima vlasti	244.600
614200	Tekući transferi pojedincima	482.000
614300	Tekući transferi neprofitnim organizacijama	243.000
614400	Subvencije javnim preduzećima	5.000
614500	Subvencije privatnim preduzećima i poduzetnicima	1.000
614800	Drugi tekući rashodi	51.000
Tekući transferi i drugi tekući rashodi		1.026.600



Tekući transferi drugim nivoima vlasti planirani su u iznosu od 244.600 KM, od čega: transfer za izbore u iznosu od 43.600 KM, a transfer za JU Centar za socijalni rad Olovo u iznosu od 200.000 KM (redovna sredstva i tuđa njega i pomoć).

Tekući transferi pojedincima planirani su u iznosu od 482.000 KM, od čega za: ostale isplate pojedincima iz materijalno-socijalne sigurnosti nezaposlenih osoba u iznosu od 15.000 KM, za izdatke za vojne invalide, ranjene borce i porodice poginulih boraca iznos od 280.000 KM, za izdatke za raseljena lica – Općina u iznosu od 17.000, za isplatu stipendija (kantonalna sredstva) planirana su sredstva u iznosu od 90.000 KM, dok je za ostale transfere pojedincima (porodilje, đачke karte i poticaje poljoprivrednoj proizvodnji - fizička lica) ukupno planirano 80.000 KM (u strukturi: za porodilje je planirano 30.000 KM, za đачke karte 25.000 KM, a za poticaje poljoprivrednoj proizvodnji - fizička lica 25.000 KM).

Tekući transferi neprofitnim organizacijama planirani su u iznosu od 243.000 KM, od čega: grantovi neprofitnim organizacijama u iznosu od 94.000 KM, grantovi boračkim organizacijama od posebnog značaja u iznosu od 6.000 KM, za JU „Centar za kulturu, sport i informisanje“ Olovo planirana su sredstva u iznosu od 138.000 KM, dok su za vjerske zajednice planirana sredstva u iznosu od 5.000 KM.

Raspodjela sredstava nevladinim/neprofitnim organizacijama vrši se u skladu sa Pravilnikom o načinu odabira projekata nevladinih/neprofitnih organizacija, na osnovu javnog poziva za predaju projektnih prijedloga koje će finansirati/sufinansirati Općina Olovo. Zaključak o raspodjeli sredstava, nakon bodovanja prijava/projekata od strane komisije, donosi Općinski načelnik. Zaključak o raspodjeli sredstava, s tabelarnim prikazom svih nevladinim/neprofitnim organizacijama koje ispunjavaju uslove javnog poziva, objavljuje se na web stranici Općine, nakon čega se zaključuju ugovori sa korisnicima.


Od ukupnog iznosa sredstava planiranih za JU „Centar za kulturu, sport i informisanje“ Olovo iznos od 32.000 KM planiran je u svrhu realizacije projekta „Sportske igre mladih“.

Drugi tekući rashodi planirani su u iznosu od 51.000 KM, od čega za naknade za povrat više ili pogrešno uplaćenih sredstava iznos od 21.000 KM, dok je za izvršenje sudskih presuda i rješenja o izvršenju planiran iznos od 30.000 KM

82 – Kapitalni izdaci

Ekonomski kod 8200000, planirani iznos od 2.754.000 KM i manji su u odnosu na rebalans plana tekuće godine (rebalans 3.059.500 KM) za 305.500 KM. Kapitalni izdaci su planirani kako slijedi:

Glavna grupa	Naziv konta	Prijedlog 2024. godina
821100	Nabavka zemljišta, šuma i višeg. zasa.	20.000
821200	Nabavka građevina	1.500.000
821300	Nabavka opreme	25.000
821500	Nabavka stalnih sredstava u obliku prava	222.000
821600	Rekonstrukcije i investicijsko održavanje	676.000
823300	Otplata domaćim pozajmljivanjima	311.000
UKUPNO		2.754.000



Kapitalni izdaci planirani su u iznosu od 2.754.000 KM.

Nabavka zemljišta, šuma i višegodišnjih zasada - izdaci za nabavku zemljišta (821111) planirani su u iznosu od 20.000 KM i manji su za 12.500 KM u odnosu na rebalans plana tekuće godine. Sredstva planirana za postupke rješavanja imovinsko-pravnih odnosa.

Nabavka građevina planiran u iznosu od 1.500.000 KM. Planirani izdaci su za 98.100 KM manji u odnosu na rebalans plana tekuće godine. Plan je sljedeći:

- Nabavka zgrada - planirana su sredstva u iznosu od 200.000 KM za realizaciju projekta „Dječije obdanište“ i sredstva u iznosu od 50.000 KM za realizaciju projekta „Višenamjenska hala na lokaciji Poslovna zona Golubište“,
- Vanjska rasvjeta, pločnici i ograde - planirana je izgradnja novih javnih rasvjeta na području općine.
- Putevi i mostovi –Struktura izdatka: Izgradnja puta na lokaciji Zeleni vir u iznosu od 300.000 KM i izgradnja mosta preko rijeke Stupčanice kod MSŠ Musa Ćazim Ćatić u iznosu od 100.000 KM.
- Objekti vodovoda i kanalizacije - planirani izdaci za realizaciju projekta „Izgradnja vodovoda Zeleni vir“ u iznosu od 120.000 KM (dio sredstva u iznosu od 100.000 KM obezbijeđen od Federalnog ministarstva prostornog uređenja), a ostatak sredstava planiran je za druge vodovode.

- Ostali objekti – Projekti: uređenje izletišta Zeleni vir, izgradnja pasarele na lokaciji Gradina i izgradnja bazena termalne vode u naselju Solun (sredstva u iznosu od 300.000 KM obezbijedena od Ministarstvo za obrazovanje, nauku, kulturu i sport ZDK)

Nabavka opreme planirana u iznosu od 25.000 KM. Od ukupnog iznosa planiranih sredstava sredstva u iznosu od 5.000 planirana su za nabavku namještaja za potrebe Općine Olovo, iznos od 15.000 planiran je za nabavku kompjuterske opreme, dok su za nabavku mašina, uređaja, alata i instalacija (za potrebe CZ) planirana sredstva u iznosu od 5.000 KM:

Nabavka stalnih sredstava u obliku prava planirana je u iznosu od 222.000 KM. Od ukupnog iznosa sredstava za realizaciju projekata: „Utopljanje Dom zdravlja sa stacionarom Olovo“, za čiju realizaciju su sredstva obezbijedena od Federalnog ministarstva prostornog uređenja u iznosu od 50.000 KM i JU Dom zdravlja sa stacionarom Olovo u iznosu od 73.896 KM, i sredstva u iznosu od 100.000 KM za realizacija projekta „Izrada RP Olovo“. Realizacija projekta će se finansirati iz sredstava katastra.

Rekonstrukcije i investicijsko održavanje planirane u iznosu od 676.000 KM. Od ukupnog iznosa sredstava za rekonstrukciju cesta i mostova planiran je iznos od 360.000 KM, za rekonstrukciju stanova planiran je u iznosu od 16.000 KM (planirana rekonstrukcija stanova u vlasništvu Općine Olovo u svrhu dodjele u zakup licima u stanju socijalne potrebe), dok je za rekonstrukciju vodovoda planiran iznos od 300.000 KM (zamjena postojećeg distributivnog cjevovoda od cementno-azbestnih cijevi od rezervoara Jelik do Solitera i zamjena distributivne mreže u gradu)

Otplata domaćim pozajmljivanjima planiran u iznosu od 311.000 KM.

Izdaci za otplate dugova (na poziciji otplate domaćim finansijskim institucijama) obuhvataju novo kreditno zaduženje u svrhu finansiranja projekta Izgradnja izletišta Zeleni vir (veza Odluka Općinskog vijeća Olovo o kreditnom zaduženju Općine Olovo broj: 01-01-3-921/22 od 24.05.2022. godine), te dva lizinga u svrhu nabavke stalnog sredstva višenamjenska radna mašina. Plan je sljedeći: otplate stranim vladama planiran je u iznosu od 196.000 KM i otplata domaćim finansijskim institucijama planiran je u iznosu od 115.000 KM.

53 – Izvori sredstava rezervi

U skladu sa Zakonom o budžetima u Federaciji Bosne i budžetom se utvrđuje visina tekuće rezerve koja ne smije prelaziti 3% budžetskih prihoda bez namjenskih prihoda, vlastitih prihoda i bez primitaka. Sredstava rezerve planirana su u iznosu od 12.000 KM.

59 – Neraspoređeni višak prihoda i rashoda

Općinsko vijeće Olovo, na sjednici od 29.12.2022. godine, donijelo je Odluku o rasporedu viška rashoda nad prihodima ostvarenih u Budžetu Općine Olovo za 2022. godinu (broj: 01-01-3-27/23 od 29.12.2022. godine). U 2022. godini iskazan je gubitak u iznosu od 512.619,00 KM. Članom 3. Odluke utvrđeno je da se iznos deficita koji se pokriva precizira Budžetom Općine Olovo za svaku fiskalnu godinu u kojoj se planira pokrivanje deficita. U skladu sa članom 3. Odluke o rasporedu viška rashoda nad prihodima ostvarenih u Budžetu Općine Olovo za 2022. godinu, u Budžetu Općine Olovo za 2023. godinu, planiran je iznos od 100.000 KM za pokriće ostavrenog deficita iz 2022. godine.

